

14. maj 2009. Tele Greenland A/S-p ataatsimeersuarnerani **Naalakkersuisut** kinguliiniittut nalunaarutigissat:

*”Aallaqqaasiutigalugu ukiumi qaangiuttumi qutsaviginiarpakka. Suliassat Kalaallit Nunaannut pingaarutillit suliaarsi nuna tamakkerlugu atassuteqaasersuinerup ingerlattuarnertigut aammalu nuannaarutissaavoq takusinnaallugu suliassat suliarineqartut suleqatigiinnik aallussilluarlutillu pikkorissunik, ulluinnarni annertoqisumik sunniutilinnik.*

*Tele’p immap naqqatigut Kalaallit Nunaata aammalu Island-ip Canadallu akornanni aqquutiliinnermut aningaasaliissuteqarnerata takutippaa Tele’p piginnaasaqarfigalugulu piareersimaffigigaa tele-mi suliassat iluanni pisarialimmik malinnaanissaq. Immap naqqatigut aqquutiliinerup qulakkeerpaa Kalaallit Nunaata IT-p tele-lu aqquutigalugu attaveqaqatigiinnerup ineriartortuarnissaata periarfissinneqarnera. Imatut oqaatigerusuppara immap naqqatigut aqquutiliineq pisariaqartitamik aningaasaliinerusoq Kalaallit Nunaannut pingaaruteqartoq nunatta iluani aammalu nunarsuarmut avatangiisitsinnut ataqatigiinnermik qaninnerulersitsisoq.*

*Attaveqaqatigiinneq tassaajunnaarpoq allakkasuartaat, telefax’i imaluunniit telefon’i atorlugu sivikitsuinnarmik oqaloqatigiinnermik imaqartoq. Siunissami attaveqaqatigiinneq ineriartortinneqarpoq periarfissatigut annertuutigit, pitsaassutsikkut qaffasissukkut, attaveqarnerup sukkanerulersinneqarneratigut aammalu pilersuinerup annerusumik isumannaallisarneqarneratigut. Taamaattumik **Naalakkersuisut** Tele-p immap naqqatigut aqquusiisimanera nunap ineriartortuarnissaanik aamma ikorfartuisoq pillugu annertuumik naammagisimaarinninnertik nalunaarutiginiarpaat.*

*Naalakkersuisut nuannaarutigaat TELE’p sullissinermi tunisassiamilu pitsanngorsartuarnissaa eqqummaariffigimmagu naak sinerissap agguataarsimanera inuillu eqiterussimanerata tamanna ajornakusuulersittaraluaraa. Taamaakkaluartorli ilaatigut aningaasarsiornikkut ajornartorsiorneq ingerlasoq pissutigalugu siunissami aningaasartuutit eqqumaffigisariaqarpagut aammalu piffissami qaninnerpaami misissortariaqarlugit aningaasaliissutit imminnut akilersinnaanersut aammalu aningaasaliissutit nalinngi nuannaarutigalugit inuit taakkunanga atuisut amerlassusaannut sanilliuttariaqarlugit.*

*Pingaarutilerujussuuvoq suliffeqarfiutitta selskabiutittalu ineriartortitsinermut ingerlaqataanissaat piginnaanngorsarnissaallu attaveqaqatigiinnerup paasissutissanillu nassiussuisarnerup iluani, tassunga ilanngullugu Atlantikoq ikaarlugu paasissutissiisarnerup iluani piginnaasatigut sinneruttunik tuniniaasinnaaneq, nunarsuarmi tuniniaanermut peqataanissamut.*

*Kalaallit Nunaat ullumikkut nunarsuatta nutaaliaasup ilagaa. Tamatumunngali piumasagaataavoq attaveqaqatigiinnermi atortorissaarutininik nutaaliaasunik atuinermi killilersugaanngitsumik periarfissaqartitaanissaq.*

*Nunarsuullu nutaaliaasup ilaani allani, ineriartornerup ilaatut akiusut appariartuaartinneqarnerat internet-imut attaveqarnerup pisariinneruliartortup taamaattussaannartullu isigineqartup ilagiinnaraa, uagut immap naqqatigut kabililiinikkut internet-imut attaveqarneq pitsaanerusoq atugarileraluarlutigu, illuatungaaticut atuisunit ataasiakkaanit aningaasartuutit tamatumunnga naapertuutinngitsumik qaffannerat malugineqarput. Pissutsit taamaannerisa kingunerisaannik inoqutigiit ataasiakkaat killiligaanngitsumik internet-imik atuisinnaanngillat, eqqarsaatigiuaannartariaqarpaammi internet-imut akiligassami qaffapiloornissaa. Pisariaqartinneqarpoq nunatsinni atuisartut nunani killerni allanisulli qaammammut aalajangersimasumik innuttaasunillu akilerneqarsinnaasumik annertussusilimmik akiliuteqarlutik atuisinnaanngortinneqarnissaat, - tassalu tamanna ima paasillugu, qaammammut akiliut nikerartuunngitsoq, tupaallaatissartaqanngitsorlu.*

*Naalackersuisut isumalluarfigaat atuisut siunissami inuiaqatigiinnut naleqqussakkamik akiliisalerumaartut kiisalu atuisut piumasaannut naleqquttunik atugassaqartitaalerumaartut.*

*Tamatumalu assigisaanik inuussutissarsiutillit nunarsuarmi akiusunut unammillersinnaasunik akiliuteqarnissartik pisariaqartippaat. Inuussutissarsiornermik ingerlatsiviit Kalaallit Nunaanni inuussutissarsiutinik aallartitsinissamik kissaateqartut nalilersuinerminni pissutsit ataatsimut uuttortartarpaat, tamatumanilu akileraarutinut tunngasut, meeqqanut paaqqinnittarfeqarneq il.il., aammalu taakkununga ilaatillugu internet-imut attaveqaatinut atugassarititaasut ataatsimut nalilersortarpaat. Ingerlatseqatigiiffiup Internettimi akit, sanaartukkallu pitsanngorsarnerani pillugit qanimut oqaloqatigiinnissaat Naalackersuisut qilanaaraat, taamaalilluni suliffeqarfuit aamma ajunnginnerpaamik isumagineqarnissaat qulakkeerneqarniassammata.*

*Inuussutissarsiornikkut ingerlatsiviit aammalu innuttaasut, internet-imik atuinissaannut kaammattugassaapput, tamatumanilu periarfissaticut qiimmassarneqartariaqarput, periarfissaqarfiisigut, taama iliorneq inuiaqatigiit aningaasarsiornernut avatangiisinillu atuinitsinnut iluaqutaammata.*

*Immap naqqatigut kaabilimut tunngatillugu siusinnerusukkut oqaatigeriikkattut nuannaarutissaavoq silatusaarnerullunilu TELE-mit aningaasaliissuteqarneq taanna*

ingerlanneqarmat, iluatittumillu atulersinneqarluni. Immap naqqatigut kaabilimik atortorissaaruteqalerneq, nunatta ineriartornikkut aaqqissuunneqarnerani sannat tunngaviusut ilagaat, attaveqaqatigiinnikkullu atortorissaarutaanermi saniatigut nunatsinni ineriartornikkut perrassaataasinnaasariaqarluni. Tassani uanga sammiviit arlaqartut eqqarsaatigaakka. Immap naqqatigut kaabili aningaasarsiornikkut ineriartornitsinni nutaanik aningaasaliissuteqarnissanut perrassaataasariaqarpoq, taamalu ineriartornermik nammineq pilersitsilluni, suliffissaqarnikkullu annertusaanermut aqputissiuilluni, suliffeqarfinni kiffartuussinikkut ingerlatsiffiusuni assigiinngitsuni, (IT-mik atuinermi siunnersuinikkut, niuernikkut il.il.).

Immap naqqatigut kaabili aamma ilinniartitaanikkut ingerlatsiviit akornanni suleqatigeeriaatsinik nutaaliaasunik ineriartortitsinerlut perrassaataasinnaasariaqarpoq, Kalaallit Nunatsinni namminerlu, aammalu nunarsuup sinneranut. Taamaaliornerlu inuusuttatsinnut ilinniagaqarniartunut taamalu inuiaqatigiinnut tamarmiusunut iluaqutaasumik ingerlanneqarluni.

Kiisalu naatsorsuutigaara, immap naqqatigut kaabililiineq annertuumik nipilersoqataassasoq oqaasiinnangitsumik, kisiannili piviusumik tunngaveqartumik, Attaveqaqatigiinnermut tunngasutigut niueqatigiinnermik unammilleqatigiiffiusumik ingerlatsilernissamut. Aamma Kalaallit Nunatsinni pisariaqartipparput attaveqaqatigiinnermut tunngasumik ingerlatsinerlu unammilleqatigiittoqalernissaa. Tamatumunngalu ilutigitillugu pingaaruteqarpoq eqqumaffigissallugu Tele Greenland-ip niuerfimmi unammilleqatigiiffiusumi suli aamma qimuttutut pingaarnertut inissisimajuarnissaa, tamatumunngalu atatillugu suli isumagisassarissallugu attaveqaqatigiinnermi nunarput tamakkivillugu attaveqaatinik atortorissaarusersuinikkut sanaartorneq ineriartortitsinerlu. Uanga qularutiginnilara Tele Greenland-ip periarfissanut nutaanut aaqqissuussaaniikkut silatuumik tunngaveqartumik ineriartornissaa, tamatumani niuerfimmi unammilleqatigiiffiusumi sullissisutut unammilleqatigiinnerup annertusiartornerani malinnaasinnaajuarnissaa.

Allakkerisarfegarnerup iluani suli allakkat ikiliartornerannik pissuteqartumik tatisimaneqarpoq, ilaatigut teknikkikkut ineriartortitsinerlut pissuteqartumik, periarfissiisimasumillu e-mail'ip amma

*attaveqaatit angerlarsimaffimmiit atorneqarsinnaanerannik. Naak pissutsit tamakkua atuukkaluartut taamaattoq POST Greenland'i inernernik naammaginartunik takutitseqqissimavoq. Ajornartorsiutit immikkut ittut POST Greenland-imut attuumassuteqartut piunerat **Naalakkersuisut** ilisimavaat aammalu nuannaarutigalugu POST Greenland-ip pitsaanerpaamik anigorniagasanik suli naammasiiniartuarsinnaammat.*

***Naalakkersuisut** pisariaqarluinnartutut isigaat piginnaasanik qaffassaanermik suliniutit inuiaqatigiinni tamani salliutinneqartuarnissaat. Taamaattumik Tele Greenland-ip ilinniartitaanikkut piginnaasanillu ineriartortitsinikkut suliniuteqarnera **Naalakkersuisut** ilassilluarpaat. Ilinniartitaaneq annertusisamillu ilisimasaqarneq nalinginnaasumik suliffiup suliaanut pitsaassusiuvoq annertunermillu suleqatinut ataasiakkaanut suliassanut tunngatillugu pitsaaqutaalluni. Siunissaq aggersoq isigalugu pisortatut kalaallinik ilinniartitsineq nalinginnaasumik inuiaqatigiinnut suliffimmullu iluaqutaassaaq aammalu **Naalakkersuisut** kissaatigaat anguniakkat tamakkua ingerlanneqartuassasut.*

*Sikuijuitsumi avannarlermi avatangiisinut tunngassuteqartut mianernartorujussuupput. Taamaattumik **Naalakkersuisut** pingaartittorujussuuvaa, Tele Greenland'p atortuutimigut atortussatigullu ilusilersuinini aammalu suliatigut ingerlatsini aqqissuuttuassagai, taakkua avatangiisinik sunniinerat minnerpaaffimminiitittuarlugu.*

*Piffissaq atorumavara suli ataasiarlunga siulersuisusit qullersaqarfiullu ukiumi qaangiuttumi suliaat pillugit qutsavigeqqikkumallugit. Aammattaaq qullersaqarfik qinnuiginiarpara selskab'ip sulisuinut ukiumi qaangiuttumi sulinermikkut takutitaat pillugu qujarujussuarnera ingerlateqqeqqullugu.*

*Taamatut oqaaseqarnikkut siulersuisut nalunaarutaat **Naalakkersuisut** tusaatissatut tiguaat.”*